



108年教育部

閩客語文學獎

用本土語言尋找文學的能源



閩南語 ▶ 現代詩 ▶ 教師組

黃明峯先生

得獎作品 /

天光進前

——讀黃溫恭醫生(1920-1953)
被銃殺前一暝，寫予牽手的批信



【得獎感言】

創作，創作，再創作。

我相信愛文學的人擁有一粒溫暖柔軟的心，對眾生，對世界，充滿愛伶關懷。



天光進前 —— 讀黃溫恭醫生(1920-1953)被銃殺前一暝， 寫予牽手的批信

練習用賭剩的月光寫批
佇最後這暝。記持
是一粒紡誠緊的干樂
一輾閣一輾
一直紡轉去你的身邊

已經慣勢
共目屎關佇心內
共溫暖的愛寫入去
批信內底。按呢
向望時間，是毋是
會當行較慢的？

練習一字一字寫予清楚
佇這個烏陰暗甍
氣氛若僵屍的櫬仔內
壁，是四隻忠心的老土狗
四籬圍仔看守我的行動
擰頭，三尺有——
烏雲，袂振袂動
四四方方罩佇頭殼頂

已經慣勢
綴著鐵窗外的暗風
微微仔放空判決書的無情，放空
家己的心情。有時懷念較早
日頭溫暖土地燒烙的日子
親像進前幾工，你寄予我的
塗豆伶鹹魚仔，芳氣原在
心悶，原在

你有收著無？我寄予你的
兩支喙齒，請當做是我的屍體



若是會使，就將我的身軀
捐予臺大醫學院，予醫學生
練習解剖人體，或者是
解剖這個時代
人生的難題

今仔日透早，輪到我
值班。魚肚白的時
一步一步行出櫬仔外，然後
拊掉，家己的名字

你交代我：毋通忘記
正手，愛插入去褲袋仔
跤底，愛穿你特別寄來的白布鞋
你講按呢，準若屍身分離
面模仔難辨，嘛是會當揣著
八個外月，毋捌見面的我

1953年，5月19，暝
無聲無說的字句躺佇批信內底
我的心不時咧霆雷公，每一寸皮膚
攏親像予火燒著仝款，啊.....我的筆
敢若欲流出毋甘願的
血水.....

1953年，5月20，天光進前
我欲練習：佇清醒的時陣
做夢——咱，一家伙仔
佇咱兜的門埕，飼鴨、飼雞
有時哺甘蔗，有時食木瓜
我，會恬恬坐佇你的身邊
看你笑微微，目睷嬲嬲
泗出，一尾閣一尾
自由的魚